

ULLOQ17.10.2024

UKA2024/87

[Nunatta kujataani nannuttassiissutigineqartartut ukiumut sisamaasut 2025-miit ikinnerpaamik ataavartumillu qulinngortinneqarnissaat qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.]

(Inatsisartunut ilaasortaq, Anders Olsen Siumut)

[Siullermik siunnersuuteqartoq Anders Olsen Siumut siunnersuutaanut qutsavigaarput imatullu oqaaseqaateqassalluta:

Piniakkat piniartunit piasarisartakkat eqqarsaatigalugit Nanoq piniagaavoq immikkuullarissuseqartoq, tassami issittumi nersutit qaasuttut annersaraat ,piffimminilu qaasuttoqamminit unammilligaanngilaq, taamaattumillu piniakkanit ersigisaalluinnartuulluni

Piniagaq piasarissallugu qangarsuaaniilli pingaartitaalluinnartuuvoq, taamaattumillu piniartunit piniagaavoq pilerinartuq alutornasuseqartorlu, taamaammallu piasarissallugu pilerigineqartaqaluni, tamanna tupinnanngitsumik piasaqartunut eqqaamasasatuut inissittarpoq inuunerup sinnerani piujuartussatut

Piniagaq issittumi ukiorpassuarni naleqqussarnermigut uumasuuvoq (piniartutullu taaneqartarluni), taamaattumillu suli ukiorpassuarni issittumi takussaajuarnissaata qulakkeerinniffiunissaa pingaaruteqartorujussuulluni, tassami issittoq piutillugu avatangiisaallu taakuutillugit siumugassaajuarnissaa pingaaruteqartorujuttut taaneqarsinnaalluni

Oqaatigineqartarpoq silap allanngornerata kingorna nannut inuussutissaqarnikkut annertuumik eqqugaasimasut, tassami nerisaqarnermikkut annermik tunngavigisaat tassalu puisit, immap sikuunikillineratigut piniartarnerisa puallarsertarneralu sivikinnerulersimanerat pissutaatinneqartartoq ilisimavarput, tamannalu pingaartumik uumasunik ilisimatuunik, allatigullu malinnaaviginnittuniit oqaatigineqartartoq takornartaajunnaarsimalluni

Siusinnerusukkut oqarnertuut Nanoq issittumut naleqqussarsimavoq, nersutit nunarsuatta oqaluttuassartaani amerlasuut ilisimavarput piffimmut silamut assigisaanullu annertuumik naleqqussartarsimasut, taamaattumillu silap allanngornerata kingorna nerisassameerneragaallutik takussagalittuinnartut, tassa inoqarfinnut qanillattortut oqaatigineqartarpoq, akerlianilli aamma atuisut piniartut allamik oqariartuuteqartarnerat piousoq ilisimavarput, taakku

oqariartuuteqartarmata nannut amerlatsikkaluttuinnarnerminni allaat inoqarfinnut qanillattortalersimanagerat pissutaasartoq, piniartut ilisimasaat aammattaaq siumumiit ataqqilluinnarpagut taakkuummatami piffiminni piniakkanik ukiorpassuarni takusaqartarnermikkut aammattaaq nalilersuilluinnarsinnaasutut ataqqillugit paasisinnaalluaratsigit

Uumasunut assigiinngitsunut killilersuineq sakkortooq eqqunneqaraagat naatsorsuutigisarpaput piffik aalajangersimasoq amerliartuutigissagaat uumasut killilersuineramik eqqorneqartut, aammalu pineqartut amerliartussasut naatsorsuutigineqartarluni, kisiannili killilersuineq taamaattussaannartut isigineqartutut pilersarmat arlaagut ilumut siunertaminut naapertuussimanersoq ilaatigut eqqarsaatiginarsisarpooq, naatsorsuutigineqarmammi uumasut killilersukkat amerliartussasut, taamaammat paasissutissat assigiinngitsut pissarsiarineqarsinnaasut ilisimatuussutsikkullu paasisat saqqummiunneqartartut ilaatigut nanoqatigiit ikiliartornerannik tikkuussisartut pigaagata soorunami killiersuinerup siunertaanut uniuttutut nalileqqajaanarsisarpooq, takorloorsimasamiillu allaanerulluinnartumik kisitsisimanagerit inernerit takutitsigaagata nalilersueqqajaanarsisarpooq uppernassuseqarnerallu apeqquseqqajaanarsisarluni

Piffimmi ungasinngitsumi Tunumi sikorsuarni assinik ingerlaartitsisoqarpoq, tassa arfeq siloq nannunit amerlasuunit najorneqartoq, ilaatigut tupaallannartumik allaat nannut taamak amerlatigisut ataatsimoortut assikkut takuneqarsinnaallutik

Aammattaaq piffimmi ungasinngitsumi tunup kujataani nanoqatigiit, issittumi nanoqatigiittut nr 20-tut taaneqartut avammut saqqummiunneqarput taakku piffimminnut naleqqussartutut nanoqatigiinnut allanut akulerunnatik piusut oq aatigineqarluni, soorunami tamanna tusarlugu nuannerpoq naatsorsuutigalugu piffimmi naleqqussarlutik amerliartorlutik piusut, aammalu arlaagut piniarneqarsinnaalernissaat piulerumaartoq isumalluarnartutut oqaatigissallutigu

Piniarnermut aallaaniarnermullu inatsit suliarineqarmat ilanngullugu naqissuserneqarpoq kulturikkut pisassiarnissat piulissasut, tamanna assut Siumumiit nuannaarutigini kuuarput, taamaattumillu piniakkanut annermik killilersukkanut sunniuttumik suli atuutsinneqannginnera piffissaq manna iluatsillugu uparuarusullutigu, tassami atuutsinneqalerneragut inuiattut inuusaasitoqarput atorlugu piniarneqarsinnaanerisa ilaatinneqalernissaat kissaatigalutigu oqariartuutigissuarput

Naalakkersuisut akissuteqarnerminni tunumi tunullu kujataani misissuisoqarnera pillugu nalunaarusiaq 2024-mi ukiakkut imaluunnit 2025-mi upernaakkut saqqummiunneqartussa q takooqqaarusullugu oqariartuuteqarput, erseqqissarusulluguli siunnersuuteqartup tunngavilersuutai ilalernartoqartikkatsigit ima paasillugu piffimmi pineqartuni nannuttassiissutit ikippallaarnerat pillugu oqariartuuteqarnera avaqqunneqarsinnaanngitsutut isigalutigu

Taamaattumik Siumumiit Nannuttassiissutit Naalackersuisuniit akuersissutigineqartut iluini Nalunaarummi §5,imm2. Tut taallugit allatut ajornartumik illersuisariaqalernermmik taallugu nannuttassat qulit pisassiissutit piusut ornikkusuppagut,tassanngaanniillu tallimat Nunatta kujataanut utaqqiisaasumik nalunaarusiap takkunnissaata tungaanut pisassissutaanissaat kaammattuutigissallutigu,tassami nalunaarusiassaq taaneqartoq qanoq imaqassasoq naluarpur,amma naluarpur ukiaq manna saqqummiunneqassanersoq imaluunniit upernaamut aatsaat,taamaammat pisassanut sunniunnissaa aatsaat 2026 -mi pisinnaasoq ilimaateqarluinnarluni,tamannalu utaqqisinnaanagu naqissusiissalluta

Taamaattumik siunnersuut ataatsimiititaliamut susassaqtumut ingerlateqqipparput ilaatigut oqariartuutitta oqimaalutarluarneqarnissaanik kissaassilluta oqaluuserineqarluarnissaa kissaatigalugu

]

[Jens Kristian Therkelsen, Siumut]